


MO ROTHAR NUA



Pictiúr: Radharc:

Lasmuigh de theach Mhichíl, Micheál agus Seán ag féachaint ar an rothar, cáca milis agus deich gcoinneal air, athair Mhicíl; comhartha ceiste, rothar nua Mhichíl, cáca milis agus deich gcoinneal air, lé cur sa chiorcal cainte de réir bhrí na cainte. Seán ag dul síos an bóthar ar an rothar, páiste amuigh ar an mbóthar, Seán ag bualadh an chloigín, ansin é ag tarraingt na gcoscán, an bheirt bhuaichail ag gáire.

Céim 4. Codanna an rothair; na cluasa, bonn, bolg, na troithíní, cloigín, slabhra, roth tosaigh, roth deiridh.

CÉIM 1. CLOISTEÁIL AGUS AITHINT

Cuntas Reatha

Breithlá Mhichíl a bhí ann inné. Bhí sé deich mbliana d'aois. Fuair sé rothar nua óna athair.

Agallamh

SEÁN: Sin rothar iontach atá agat. Cá bhfuair tú é?

MICHEÁL: Thug m'athair dom é mar bhronntanas. Bhí mo bhreithlá ann inné.

SEÁN: Ba bhreá liom dul ag rothaíocht air.

MICHEÁL: In airde leat ach téigh go mall.

Cuntas Reatha

Síos an bóthar le Seán. Rith páistí amach. Bhuail Seán an cloigín. Tharraing sé na coscáin. Tháinig an bheirt acu slán.

CÉIM 2. AITHRIS

CÉIM 3. ATHRÁ Ó SPREAGTHAIGH

(a) Spreagthaigh shúl (mar atá i gCéim 1);

(b) Spreagthaigh chluas:

Bhí lá mór ag Micheál inné?

Cén aois a bhí aige?

Fuair sé bronntanas, is dócha?

Cad a deir tú faoin rothar, a "Sheáin"?

Cuir ceist air faoi.

Freagair é, a "Mhichíl".

Cén fáth?

Céard ba mhaith leatsa, a "Sheáin"?

Abair leis go bhfuil cead aige dul ag rothaíocht, a "Mhichíl"?

Cá ndeachaigh Seán?
 Céard a tharla?
 Céard a rinne Seán? Agus ansin?
 Níor gortaíodh na buachaillí?

CÉIM 4. CLEACHTADH MÚNLAÍ AGUS FOCLÓRA

- Bhí sé **deich mbliana** d'aois.
 (**bliain; dhá bhliain; trí bliana**, etc.)
 Cleachtadh a thabhairt ar cheisteanna agus freagraí den chineál:
Cén aois thú? (Cad is aois duit?). Táim mbliana d'aois.
- Fuair sé rothar nua óna athair.
 (**gach lá; anois; amárach; dá mbeadh a bhreithlá ann; ní, an? inné; ní, an? amárach; ní, an? gach lá**).
- Ba bhreá liom**
 Páistí a mhealladh chun an abairt seo a chríochnú ar shlite éagsúla.
- Trí mhím agus trí gheáitsíocht cleachtadh a thabhairt ar úsáid:
suas, anuas, thuas; síos, aníos, thíos.
- An foclóir a bhaineann le codanna an rothair a thabhairt isteach anseo más mian; e.g. **cluasa, bonn, bolg, cloigín**, etc.
nó
 Páistí a mhealladh chun ceisteanna mar
Cá bhfuair? Cár chuir? Cá bhfuil? Cá raibh? Cá ndeachaigh?
 a chur agus a fhreagairt.

CÉIM 5. SAORCHOMHRÁ CRUTHAITHEACH

- Seán ag insint dá athair faoi rothar Mhichíl.
- Thit Micheál den rothar inis an scéal.
- Dráma: Micheál ag teacht abhaile oíche agus gan aon lampa a bheith ar a rothar aige.
- D'fhág Seán an rothar taobh amuigh de shiopa lá: goideadh é. An scéal a insint.
- Comhrá ginearálta agus ceisteanna ar na pictiúir.
- Gearrann na páistí pictiúr de rothar as leabhar nó tréimh-seachán. Cuireann siad isteach ina gcóipleabhar é tar éis dóibh lipéad nó ainm a scríobh (e.g. bonn, cluasa, etc.) ar na codanna éagsúla de.

Rann Ceoil (An ceol ar théip)
 (Féach Ceacht 33, *Tír na nÓg*)
Curfá

Mo rothar álainn buí!
 Mo rothar álainn buí!
 Is maith liom 'bheith ag rothaíocht
 Ar mo rothar álainn buí.

I

Tá rothar 'gamsa;
 Rothar álainn buí.
 Tá cloigín air is diallait,
 Is rotha bána buí.

II

Dath dearg ar na cluasa;
 Slabhra is dhá bhonn;
 Na boilg agus teannaire,
 Le haer a choinneáil ann.

COMHRÁ MÍFHOIRMIÚIL

A

An bhfuil rothar agat?
 Cé thug duit é?
 Cé mhéad a bhí air?
 Cén dath atá air?
 Cé mhéad roth atá faoi? (Cur síos iomlán a dhéanamh ar chodanna an rothair, m.sh. Tá dhá *roth* faoi; *Roth tosaigh* agus *roth deiridh*; Tá *cloigín* ar na *cluasa*; Buailim an *cloigín* nuair a bhím ag dul síos an bóthar; Cuirim aer isteach sa *bolg* le *teannaire*; Tá an *bolg* istigh sa *bhonn*, etc.)

B

Druileanna a dhéanamh ar chuid de na briathra seo a leanas san Aimsir Ghnáthláithreach:
Téigh, Ith, Déan, Cuidigh, Cóirigh, Scuab, Nigh.

Cén t-am a **dtéann** tú abhaile ón scoil gach lá?
 Céard a **dhéanann** tú nuair a shroicheann tú an teach?
 Céard a **dhéanann** tú tar éis an dinnéir?
 Cén t-am a **ndéanann** tú do cheachtanna?
 An **gcuidíonn** Mamaí/Daidí leat?
 An **gcuidíonn** tusa le Mamaí sa chistin?
 An **gcuidíonn** tú le Daidí sa ghairdín?
 Cén obair a **dhéanann** tú?

(m.sh. **Cóirím** na leapacha; **Scuabaim** an t-urlár; **Ním** na gréithe; **Téim** go dtí an siopa ar mo rothar; **Bainim** an féar sa ghairdín, etc.)